

Definì strategia per promover l'economia

■ (anr/fa) Il cussegl grond ha tractà il rapport davart il svilup economic en il chantun Grischun e prendi enconuschientscha da quel. Quest affar politic è stà l'ultim sut la direcziun da cusseglier guvernativ Hansjörg Trachsel. Il rapport da la regenza davart il svilup da l'economia grischuna en ils proxims onns ha la finamira da rinforzar da moda perdurabla quest svilup economic er en las regions periferas. Il rapport cun sias 80 paginas è vegnì ludà da tut las varts e partidas. Durant dus dis han discutà las deputadas ed ils deputads al cussegl grond intensivamain areguard la strategia chantunala ils proxims onns en connex cun il svilup da l'economia. La finamira da la regenza cun la promozion economica ha declarà cusseglier guvernativ Hansjörg Trachsel: «Ins vul cuntanscher ch'i flueschian daplirs daners da l'extern en Grischun.» El ha ditg ch'il chantun sez na stgaffeschia betg plazzas da lavur, quai fetschia l'economia. Entant ch'igl è stà incontestà da promover era vinavant il turissem sco pitga principala da l'economia grischuna era la maioritad dal parlament, cun 56:52 vuschs, da l'avis da chalar cun las promozions da singulas interpresas.

Sustegn da la gronda part dals deputads e partidas ha chattà tranter auter la proposta da Philipp Gunzinger (pld, Suot Tasna) da s'engaschar per ina cumbinaziun dal turissem ed il sector da sanadad. Ils proxims otg onns, en las proximas duas periodas da legislatura, vul il chantun spender 80 milliuns francs per la promozion da l'economia chantunala. Quai vegn el a far cun realisar las differents miras ch'il cussegl grond ha discutà durant ils ultims dus dis. Il parlament ha prendi enconuschientscha dal rapport.

Cun 106:0 vuschs e duas abstenziuns da la vusch ha il parlament acceptà l'incumbensa da la fracziun ps che dumonda dal chantun da s'engaschar per ch'i vegnian colliadas las regions grischunas cun la rait da la fiberoptica. Urs Marti (pld, Cuir), il president da la cumissiun predeliberanta, ha fatg in compliment a las deputadas ed als deputads per la «discussiun disciplinada». Il departament dal nov cusseglier guvernativ Jon Domenic Parolini vegn a preparar la lescha correspundenta per pudair influenzer e rinforzar il svilup da l'economia chantunala tenor la strategia definida dal parlament.

Sustegn per l'incumbensa Toutsch

Cun 83:1 vuschs ha il cussegl grond incaricà la regenza grischuna da preparar in rapport davart ils custs ch'il PI 21 vegn a chaschunar. Il Grischun prevesa d'implementar il PI 21 l'onn 2018/19, in onn pli tard che previs. Causa che Domenic Toutsch (pps, Sur Tasna) e 41 collegas deputads fan quitads causa ils custs dal Plan d'instrucziun 21 (PI 21) avevan els inoltrà durant la sessiun d'avust in'incarica. Quella incumbenscha la regenza da far e preschentar al parlament in rapport davart ils custs per l'implementaziun dal PI 21 per il chantun Grischun. En sia resposta mez october aveva la regenza declarà d'esser pronta d'acceptar l'incumbensa Toutsch. Tutina ha quel dumandà la discussiun: El saja dischillus ch'i vegnian anc adina pretais en il PI 21 per ils scolars grischuns competenzas en rumantsch grischun (rg). Cusseglier guvernativ Martin Jäger ha respus ch'el supponia che Toutsch fissia pir content, sch'ins na duvrass mai pli il rg. «Ins vegn però ad implementar il model da coesistenza dal rg e dals idioms», ha menziunà Jäger. En connex cun la data da metter en vigor il PI 21 ha el ditg ch'il Grischun prevesa da far quai per l'onn da scola 2018/19: «Quai è in onn pli tard ch'ils blets chantuns, uschia pudain nus guardar tge experientschas che quels fan cun il plan d'instrucziun cuminaivel.» Il cussegl grond ha decis cun 83:1 vuschs ed otg abstenziuns da la vusch da surdar a la regenza l'incumbensa Toutsch.



Il rapport da la regenza davart il svilup da l'economia grischuna en ils proxims onns ha la finamira da rinforzar a moda perdurabla quest svilup economic er en las regions periferas.